

## **D.R. 25/2023**

# **RANG UNDANG-UNDANG KAWALAN PRODUK MEROKOK DEMI KESIHATAN AWAM 2023**

---

### **SUSUNAN FASAL**

---

#### **BAHAGIAN I**

##### **PERMULAAN**

*Fasal*

1. Tajuk ringkas dan permulaan kuat kuasa
2. Tafsiran

#### **BAHAGIAN II**

##### **PENDAFTARAN**

3. Kehendak bagi pendaftaran produk tembakau, dsb.
4. Permohonan bagi pendaftaran
5. Pembatalan pendaftaran
6. Daftar produk tembakau, dsb.

#### **BAHAGIAN III**

##### **PENGIKLANAN, PROMOSI DAN TAJAAN**

7. Larangan pengiklanan produk tembakau, dsb.
8. Larangan pengiklanan produk tembakau, dsb., tiruan
9. Larangan promosi atau tajaan produk tembakau, dsb.

#### **BAHAGIAN IV**

##### **KAWALAN PENJUALAN**

10. Larangan penjualan produk tembakau, dsb.
11. Larangan penjualan produk tembakau, dsb., tiruan

*Fasal*

12. Larangan produk tembakau, dsb., sebagai pemberian atau hadiah
13. Larangan penjualan produk tembakau kepada orang yang lahir pada 1 Januari 2007 dan seterusnya
14. Larangan penjualan bahan merokok, dsb., kepada orang yang lahir pada 1 Januari 2007 dan seterusnya

## BAHAGIAN V

## KAWALAN HARGA, PEMBUNGKUSAN, PELABELAN, PENGILANGAN, DSB.

15. Harga runcit atau harga jualan minimum
16. Pembungkusan dan pelabelan

## BAHAGIAN VI

## LARANGAN MEROKOK

17. Kawasan atau tempat larangan merokok
18. Larangan merokok produk tembakau bagi orang yang lahir pada 1 Januari 2007 dan seterusnya
19. Larangan merokok produk pengganti tembakau, dsb., bagi orang yang lahir pada 1 Januari 2007 dan seterusnya
20. Tanggungjawab tuan punya bangunan, dsb.

## BAHAGIAN VII

## LIABILITI PENGILANG, PENGIMPORT DAN PENGEDAR

21. Anggapan perkara berkaitan dengan pelabelan dan pembungkusan
22. Tanggungjawab pengilang, pengimport atau pengedar

## BAHAGIAN VIII

## PENTADBIRAN

23. Situasi akut atau kritikal
24. Pelantikan juruanalisis
25. Makmal yang diluluskan
26. Pelantikan pegawai diberi kuasa

BAHAGIAN IX  
PENGUATKUASAAN

*Fasal*

27. Kuasa penyiataan
28. Kuasa untuk memasuki premis
29. Kuasa untuk mengambil sampel
30. Tatacara mengambil sampel
31. Anggapan
32. Kuasa untuk membuka bungkusan dan memeriksa produk tembakau, dsb.
33. Kuasa untuk memberhentikan, menggeledah dan menyita pengangkut
34. Penggeledahan dan penyitaan dengan waran
35. Penggeledahan dan penyitaan tanpa waran
36. Akses kepada maklumat berekod, data berkomputer, dsb.
37. Penyitaan benda, dsb.
38. Senarai benda yang disita
39. Pemulangan sementara pengangkut, dsb.
40. Kos memegang produk tembakau yang disita, dsb.
41. Kuasa untuk menghendaki kehadiran orang yang mempunyai pengetahuan tentang kes
42. Pemeriksaan orang yang mempunyai pengetahuan tentang kes

BAHAGIAN X  
PERBICARAAN DAN PROSIDING

43. Pendakwaan
44. Notis terlebih dahulu tentang keterangan pakar dalam mahkamah
45. Bidang kuasa untuk membicarakan kesalahan
46. Perlindungan kepada pemberi maklumat
47. Keterangan ejen provokasi boleh diterima
48. Tiada penzahiran maklumat
49. Kuasa untuk memerintahkan kehadiran ke mahkamah

BAHAGIAN XI

AM

50. Pengkompaunan kesalahan
51. Kesalahan oleh pertubuhan perbadanan

*Fasal*

52. Perlindungan terhadap guaman dan prosiding undang-undang
53. Tanggung rugi
54. Perwakilan kuasa
55. Kuasa untuk membuat peraturan-peraturan
56. Laporan berkala

## BAHAGIAN XII

## KECUALIAN DAN PERALIHAN

57. Kecualian
58. Peralihan

# RANG UNDANG-UNDANG

## *b e r n a m a*

Suatu Akta untuk mengadakan peruntukan bagi perkara yang berhubungan dengan kawalan penjualan dan pembelian produk tembakau, bahan merokok, produk pengganti tembakau dan peranti merokok, demi kesihatan awam untuk melahirkan suatu generasi baharu yang bebas daripada pengaruh apa-apa produk tembakau, bahan merokok, produk pengganti tembakau dan peranti merokok, dan untuk mengadakan peruntukan bagi perkara yang berhubungan dengannya.

[ ]

**DIPERBUAT** oleh Parlimen Malaysia seperti yang berikut:

### BAHAGIAN I

#### PERMULAAN

#### **Tajuk ringkas dan permulaan kuat kuasa**

1. (1) Akta ini bolehlah dinamakan Akta Kawalan Produk Merokok Demi Kesihatan Awam 2023.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan bagi permulaan kuat kuasa bahagian atau peruntukan yang berlainan Akta ini.

**Tafsiran**

2. (1) Dalam Akta ini, melainkan jika konteksnya menghendaki makna yang lain—

“bahan merokok” ertinya apa-apa bahan atau secara gabungan bahan yang mengandungi *propylene glycol*, *glycerol* atau *triethylene glycol* bagi maksud merokok;

“ditetapkan” ertinya ditetapkan oleh Menteri dalam peraturan-peraturan yang dibuat di bawah Akta ini;

“iklan” termasuklah apa-apa gambaran melalui apa-apa cara bagi maksud mempromosikan secara langsung atau tidak langsung apa-apa produk tembakau, bahan merokok, produk pengganti tembakau atau peranti merokok;

“import” ertinya untuk membawa masuk atau menyebabkan dibawa masuk ke dalam Malaysia melalui darat, air atau udara bagi maksud penjualan dari mana-mana tempat di luar Malaysia tetapi tidak termasuk membawa masuk ke dalam Malaysia apa-apa produk tembakau, bahan merokok atau produk pengganti tembakau yang terbukti dimaksudkan untuk dibawa ke luar Malaysia dalam kenderaan, vesel atau pesawat udara yang sama yang produk tembakau, bahan merokok atau produk pengganti tembakau itu dibawa masuk ke dalam Malaysia tanpa apa-apa pindah kapal atau pendaratan;

“jruanalisis” ertinya mana-mana jruanalisis yang dilantik oleh Menteri di bawah seksyen 22 atau mana-mana ahli kimia yang didaftarkan di bawah seksyen 15 Akta Ahli Kimia 1975 [*Akta 158*];

“Ketua Pengarah” ertinya Ketua Pengarah Kesihatan, Malaysia;

“menjual” atau “penjualan” termasuklah—

- (a) barter atau pertukaran barang;
- (b) menawarkan atau mencuba untuk menjual;
- (c) menyebabkan atau membenarkan untuk dijual;
- (d) mendedahkan bagi penjualan;

- (e) menerima, menghantar, mengirim, mengedar, menyampaikan atau menghantar serah bagi penjualan atau pertukaran atau melalui penjualan atau pertukaran atau menurut penjualan atau pertukaran itu;
- (f) membekalkan apa-apa produk tembakau, bahan merokok, produk pengganti tembakau atau peranti merokok yang suatu upah akan diterima oleh pembekal untuk bekalan itu sama ada secara khusus atau sebagai sebahagian daripada perkhidmatan yang dikontrakkan bagi penjualan;
- (g) memiliki apa-apa produk tembakau, bahan merokok, produk pengganti tembakau atau peranti merokok bagi penjualan atau pertukaran; atau
- (h) memiliki apa-apa produk tembakau, bahan merokok, produk pengganti tembakau atau peranti merokok dengan mengetahui bahawa produk tembakau, bahan merokok, produk pengganti tembakau atau peranti merokok itu boleh dijual, ditawarkan, ditayangkan atau didedahkan bagi penjualan, atau dilupuskan, bagi apa-apa balasan, dan ini termasuklah penjualan elektronik;

“Menteri” ertinya Menteri yang dipertanggungkan dengan tanggungjawab bagi kesihatan;

“merokok” ertinya menyedut dan menghembus asap atau wap, apa-apa produk tembakau atau produk pengganti tembakau, dan termasuklah memegang atau mempunyai kawalan ke atas apa-apa produk tembakau atau produk pengganti tembakau yang dinyalakan, dipanaskan atau diwapkan atau menggunakan apa-apa cara lain;

“pegawai diberi kuasa” ertinya mana-mana pegawai perubatan kesihatan, atau mana-mana pegawai kesihatan persekitaran atau penolong pegawai kesihatan persekitaran daripada Kementerian Kesihatan atau mana-mana pihak berkuasa tempatan, atau mana-mana orang berkelayakan yang sesuai, yang dilantik oleh Menteri menjadi pegawai diberi kuasa di bawah seksyen 26;

“pengilang” termasuklah mana-mana orang yang membungkus atau melabel produk tembakau, bahan merokok atau produk pengganti tembakau;

“pengimport” termasuklah mana-mana orang yang, sama ada sebagai pemunya, pemberi konsain, penerima konsain, ejen atau broker, memiliki, atau sebaliknya berhak kepada jagaan atau kawalan, produk tembakau, bahan merokok atau produk pengganti tembakau yang diimport;

“peranti merokok” ertinya apa-apa peranti elektronik atau peranti yang menggunakan bateri atau peranti lain termasuklah hukah yang digunakan untuk memanaskan, mengewap atau membakar bahan merokok atau produk pengganti tembakau untuk merokok;

“pertubuhan perbadanan” ertinya suatu syarikat, perkongsian liabiliti terhad, firma atau kumpulan orang yang lain;

“premis” termasuklah—

- (a) apa-apa bangunan atau khemah atau apa-apa struktur lain, kekal atau sebaliknya bersama dengan tanah yang bangunan, khemah atau struktur lain itu terletak dan apa-apa tanah bersempadanan yang digunakan yang berkaitan dengannya; atau
- (b) apa-apa kenderaan, pengangkut, vesel atau pesawat udara yang digunakan atau yang berkaitan dengan persediaan, pengawetan, pembungkusan, penyimpanan, pengiriman, pengedaran atau penjualan apa-apa produk tembakau, bahan merokok, produk pengganti tembakau atau peranti merokok;

“produk pengganti tembakau” ertinya apa-apa produk, dengan atau tanpa apa-apa tembakau atau bahan merokok, yang dimaksudkan untuk merokok yang digunakan dengan apa-apa peranti merokok;

“produk tembakau” ertinya tembakau yang diproses atau apa-apa produk yang mengandungi tembakau yang dimaksudkan bagi kegunaan manusia;

“tembakau” ertinya apa-apa produk yang diperolehi daripada daun *Nicotiana tabacum* atau spesies *Nicotiana* yang lain, sama ada dalam keadaan belum diawet atau sudah diawet dan termasuklah kacukan spesies ini, kacukan akibat daripada silangan spesies ini atau kacukan dengan mana-mana spesies pokok lain atau kacukan yang lain, atau versi spesies yang dijuruterakan secara genetik atau kacukan spesies itu.



(2) Bagi maksud Akta ini, suatu sebutan mengenai “produk merokok” hendaklah ditafsirkan sebagai suatu sebutan mengenai produk tembakau, bahan merokok, produk pengganti tembakau dan peranti merokok.

## BAHAGIAN II

### PENDAFTARAN

#### **Kehendak bagi pendaftaran produk tembakau, dsb.**

3. (1) Tiada produk tembakau, bahan merokok atau produk pengganti tembakau boleh diimport, dikilang atau diedar oleh mana-mana orang melainkan jika didaftarkan di bawah Akta ini.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

**Permohonan bagi pendaftaran**

4. (1) Suatu permohonan bagi pendaftaran produk tembakau, bahan merokok atau produk pengganti tembakau hendaklah dibuat oleh pemohon kepada Ketua Pengarah mengikut cara sebagaimana yang ditetapkan.

(2) Permohonan yang dibuat di bawah subseksyen (1) boleh ditarik balik pada bila-bila masa oleh pemohon sebelum apa-apa kelulusan oleh Ketua Pengarah.

(3) Tiap-tiap permohonan di bawah subseksyen (1) hendaklah disertakan dengan fi yang ditetapkan dan apa-apa dokumen atau maklumat sebagaimana yang ditentukan oleh Ketua Pengarah.

(4) Pada bila-bila masa selepas menerima permohonan di bawah subseksyen (1), Ketua Pengarah boleh, secara bertulis, menghendaki pemohon untuk memberikan apa-apa maklumat, butiran atau dokumen tambahan dalam apa-apa tempoh yang dinyatakan oleh Ketua Pengarah.

(5) Jika pemohon gagal untuk mematuhi permintaan yang dibuat di bawah subseksyen (4) dalam tempoh yang dinyatakan dalam permintaan itu atau apa-apa pelanjutan masa yang diberikan oleh Ketua Pengarah, permohonan itu hendaklah disifatkan telah ditarik balik tanpa menjejaskan hak pemohon itu untuk membuat suatu permohonan baharu.

(6) Setelah permohonan yang dibuat di bawah subseksyen (1) diluluskan, Ketua Pengarah boleh mengenakan apa-apa syarat sebagaimana yang difikirkannya patut dan Ketua Pengarah boleh mengubah atau membatalkan apa-apa syarat yang dikenakan.

**Pembatalan pendaftaran**

5. (1) Tertakluk kepada subseksyen (2), Ketua Pengarah boleh membatalkan apa-apa kelulusan pendaftaran yang dibuat di bawah seksyen 4 jika pemohon—

(a) telah melanggar mana-mana peruntukan Akta ini atau mana-mana peraturan-peraturan yang dibuat di bawah Akta ini;

(b) telah memungkirkan mana-mana syarat pendaftaran; atau

- (c) telah disabitkan bagi apa-apa kesalahan di bawah Akta ini atau mana-mana peraturan-peraturan yang dibuat di bawah Akta ini.

(2) Ketua Pengarah hendaklah, melalui notis bertulis, sebelum membatalkan apa-apa kelulusan bagi apa-apa produk tembakau, bahan merokok atau produk pengganti tembakau di bawah subseksyen (1), memberikan peluang kepada pemohon untuk membuat apa-apa representasi secara bertulis terhadap pembatalan itu, dan sementara menunggu keputusan, semua pengimportan, pengilangan atau pengedaran produk tembakau, bahan merokok atau produk pengganti tembakau itu hendaklah digantung bermula dari tarikh penerimaan notis itu.

(3) Mana-mana pemohon yang pendaftaran produk tembakau, bahan merokok atau produk pengganti tembakau telah dibatalkan di bawah subseksyen (1) atau digantung di bawah subseksyen (2) tidak layak untuk menuntut apa-apa—

- (a) pampasan bagi apa-apa kerugian yang disebabkan oleh pembatalan itu; dan
- (b) pembayaran balik fi yang dibayar di bawah subseksyen 4(3).

### **Daftar produk tembakau, dsb.**

6. (1) Ketua Pengarah hendaklah menyimpan dan menyenggara apa-apa daftar produk tembakau, bahan merokok dan produk pengganti tembakau yang didaftarkan di bawah seksyen 4.

(2) Daftar itu hendaklah disimpan dalam apa-apa cara dan hendaklah mengandungi apa-apa butir sebagaimana yang ditentukan oleh Ketua Pengarah.

## BAHAGIAN III

### PENGIKLANAN, PROMOSI DAN TAJAAN

#### **Larangan pengiklanan produk tembakau, dsb.**

7. (1) Tiada seorang pun boleh menerbitkan atau memudahkan mana-mana orang untuk menerbitkan apa-apa iklan suatu produk tembakau, bahan merokok atau produk pengganti tembakau yang—

- (a) mengandungi apa-apa produk tembakau, bahan merokok atau produk pengganti tembakau;

- (b) mengandungi apa-apa jenama atau cap dagang yang berhubungan dengan apa-apa produk tembakau, bahan merokok atau produk pengganti tembakau;
- (c) mengandungi apa-apa tawaran atau pelawaan untuk membeli apa-apa produk tembakau, bahan merokok atau produk pengganti tembakau;
- (d) dimaksudkan atau berkemungkinan untuk menggalakkan mana-mana orang untuk merokok; atau
- (e) mempromosikan produk tembakau, bahan merokok atau produk pengganti tembakau itu sebagai suatu produk berhenti merokok.

(2) Tiada seorang pun boleh menerbitkan atau memudahkan mana-mana orang untuk menerbitkan apa-apa iklan peranti merokok yang—

- (a) mengandungi apa-apa tawaran atau pelawaan untuk membeli apa-apa produk tembakau, bahan merokok atau produk pengganti tembakau;
- (b) dimaksudkan atau berkemungkinan untuk menggalakkan mana-mana orang untuk merokok; atau
- (c) mempromosikan peranti merokok itu sebagai suatu produk berhenti merokok.

(3) Mana-mana orang yang melanggar subseksyen (1) atau (2) melakukan suatu kesalahan dan boleh, apabila disabitkan—

- (a) sekiranya orang itu bukan suatu pertubuhan perbadanan—
  - (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
  - (ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

(i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan

(ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

### **Larangan pengiklanan produk tembakau, dsb., tiruan**

**8.** (1) Tiada seorang pun boleh menerbitkan atau memudahkan mana-mana orang untuk menerbitkan, menyebabkan untuk diterbitkan, atau mengambil bahagian dalam penerbitan, bagi apa-apa iklan yang berhubungan dengan apa-apa produk tembakau, bahan merokok atau produk pengganti tembakau tiruan yang—

(a) mengandungi apa-apa dorongan tersurat atau tersirat, cadangan atau galakan untuk membeli apa-apa produk tembakau, bahan merokok atau produk pengganti tembakau tiruan; atau

(b) penggunaannya dikira, secara tersurat atau tersirat, yang dimaksudkan atau berkemungkinan untuk menggalakkan mana-mana orang untuk merokok.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

(i) bagi kesalahan pertama, didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya; dan

- (ii) bagi kesalahan kedua atau yang berikutnya, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada sepuluh ribu ringgit dan tidak melebihi lima puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada tiga puluh ribu ringgit dan tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

### **Larangan promosi atau tajaan produk tembakau, dsb.**

**9.** (1) Tiada seorang pun boleh mempromosi atau menaja, atau mengambil bahagian dalam apa-apa perkiraan yang mempromosikan apa-apa produk tembakau, bahan merokok, produk pengganti tembakau atau peranti merokok, yang dimaksudkan atau berkemungkinan untuk menggalakkan mana-mana orang untuk merokok atau dipromosikan sebagai suatu produk berhenti merokok.

(2) Bagi maksud seksyen ini, “perkiraan” termasuklah apa-apa perjanjian, aku janji atau persefahaman yang telah atau berkemungkinan memberi kesan mempromosikan apa-apa produk tembakau, bahan merokok, produk pengganti tembakau atau peranti merokok—

- (a) dengan memberi atau menerima apa-apa tajaan, pemberian, hadiah, ganjaran, biasiswa atau lain-lain faedah yang seumpamanya; atau
- (b) dengan menganjurkan apa-apa kempen, kursus, bengkel, forum, jerayawara, perundingan atau acara.

(3) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

(i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan

(ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

(i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan

(ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

#### BAHAGIAN IV

##### KAWALAN PENJUALAN

#### **Larangan penjualan produk tembakau, dsb.**

**10.** (1) Tiada seorang pun boleh menjual atau mempamer bagi penjualan apa-apa produk tembakau, bahan merokok atau produk pengganti tembakau melainkan jika jualan atau pameran bagi penjualan itu mematuhi kehendak sebagaimana yang ditetapkan.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

### **Larangan penjualan produk tembakau, dsb., tiruan**

**11.** (1) Tiada seorang pun boleh menjual apa-apa produk tembakau, bahan merokok atau produk pengganti tembakau tiruan.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya; dan



- (ii) bagi kesalahan kedua atau yang berikutnya, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada sepuluh ribu ringgit dan tidak melebihi lima puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada tiga puluh ribu ringgit dan tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

**Larangan produk tembakau, dsb., sebagai pemberian atau hadiah**

**12.** (1) Tiada seorang pun boleh menjual—

- (a) apa-apa produk tembakau, bahan merokok atau produk pengganti tembakau bersama dengan apa-apa kupon, ganjaran, barang, tawaran atau perkhidmatan sebagai suatu pemberian atau hadiah;
- (b) apa-apa barang atau perkhidmatan bersama dengan apa-apa produk tembakau, bahan merokok atau produk pengganti tembakau sebagai suatu pemberian atau hadiah;
- (c) apa-apa produk tembakau, bahan merokok atau produk pengganti tembakau bersama dengan apa-apa produk tembakau, bahan merokok atau produk pengganti tembakau sebagai suatu pemberian atau hadiah; atau
- (d) apa-apa produk tembakau, bahan merokok atau produk pengganti tembakau yang dibungkus atau dilabel bersama atau sebaliknya dengan apa-apa barang atau perkhidmatan lain.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

**Larangan penjualan produk tembakau kepada orang yang lahir pada 1 Januari 2007 dan seterusnya**

**13.** (1) Tiada seorang pun boleh menjual apa-apa produk tembakau atau mengadakan apa-apa perkhidmatan untuk merokok, kepada mana-mana orang yang lahir pada 1 Januari 2007 dan seterusnya.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

(i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan

(ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu adalah suatu pertubuhan perbadanan—

(i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan

(ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

(3) Tiada seorang pun yang lahir pada 1 Januari 2007 dan seterusnya boleh membeli apa-apa produk tembakau.

(4) Mana-mana orang yang melanggar subseksyen (3) melakukan suatu kesalahan dan boleh, apabila disabitkan, didenda tidak melebihi lima ratus ringgit atau diperintahkan untuk melaksanakan suatu perintah khidmat masyarakat menurut Kanun Tatacara Jenayah [*Akta 593*] atau Akta Kanak-Kanak 2001 [*Akta 611*].

**Larangan penjualan bahan merokok, dsb., kepada orang yang lahir pada 1 Januari 2007 dan seterusnya**

14. (1) Tiada seorang pun boleh menjual apa-apa bahan merokok, produk pengganti tembakau atau peranti merokok kepada mana-mana orang yang lahir pada 1 Januari 2007 dan seterusnya.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

(3) Tiada seorang pun yang lahir pada 1 Januari 2007 dan seterusnya boleh membeli apa-apa bahan merokok, produk pengganti tembakau atau peranti merokok.

(4) Mana-mana orang yang melanggar subseksyen (3) melakukan suatu kesalahan dan boleh, apabila disabitkan, didenda tidak melebihi lima ratus ringgit atau diperintahkan untuk melaksanakan suatu perintah khidmat masyarakat menurut Kanun Tatacara Jenayah atau Akta Kanak-Kanak 2001.

BAHAGIAN V

KAWALAN HARGA, PEMBUNGKUSAN, PELABELAN,  
PENGILANGAN, DSB.

**Harga runcit atau harga jualan minimum**

**15.** (1) Harga runcit atau harga jualan minimum bagi apa-apa produk tembakau, bahan merokok atau produk pengganti tembakau hendaklah mengikut harga dan syarat yang ditetapkan.

(2) Apa-apa permohonan oleh mana-mana pengilang atau pengimport untuk menentukan harga runcit atau harga jualan minimum apa-apa produk tembakau, bahan merokok atau produk pengganti tembakau hendaklah dibuat kepada Ketua Pengarah mengikut cara yang ditetapkan.

(3) Harga yang ditetapkan di bawah subseksyen (1) hendaklah termasuk apa-apa duti eksais atau lain-lain cukai yang berkaitan.

(4) Tiada seorang pun boleh menjual apa-apa produk tembakau, bahan merokok atau produk pengganti tembakau yang tidak mengikut harga dan syarat yang ditetapkan di bawah subseksyen (1).

(5) Mana-mana orang yang melanggar seksyen ini melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

(i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan

(ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan
- (ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

### **Pembungkusan dan pelabelan**

**16.** (1) Tiada seorang pun boleh mengilang, mengimport atau mengedar apa-apa produk tembakau, bahan merokok atau produk pengganti tembakau melainkan jika produk tembakau, bahan merokok atau produk pengganti tembakau itu dibungkus dan dilabel mengikut kehendak yang ditetapkan.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau yang berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan

- (ii) bagi kesalahan kedua atau yang berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

## BAHAGIAN VI

### LARANGAN MEROKOK

#### **Kawasan atau tempat larangan merokok**

**17.** (1) Menteri boleh, melalui perintah yang disiarkan dalam *Warta* dan tertakluk kepada apa-apa syarat yang difikirkannya patut, mengisytiharkan mana-mana bangunan atau bahagian bangunan itu, suatu tempat atau bahagian tempat itu, atau mana-mana kawasan atau kenderaan, yang orang awam mempunyai akses sebagai suatu kawasan atau tempat larangan merokok.

(2) Tiada seorang pun boleh merokok di kawasan atau tempat larangan merokok sebagaimana yang diisytiharkan oleh Menteri di bawah subseksyen (1).

(3) Mana-mana orang yang melanggar subseksyen (2) melakukan suatu kesalahan dan boleh, apabila disabitkan, didenda tidak melebihi lima ribu ringgit.

#### **Larangan merokok produk tembakau bagi orang yang lahir pada 1 Januari 2007 dan seterusnya**

**18.** (1) Tiada seorang pun yang lahir pada 1 Januari 2007 dan seterusnya boleh merokok apa-apa produk tembakau.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi lima ratus ringgit atau diperintahkan untuk melaksanakan suatu perintah khidmat masyarakat menurut Kanun Tatacara Jenayah atau Akta Kanak-Kanak 2001.

**Larangan merokok produk pengganti tembakau, dsb., bagi orang yang lahir pada 1 Januari 2007 dan seterusnya**

**19.** (1) Tiada seorang pun yang lahir pada 1 Januari 2007 dan seterusnya—

(a) boleh merokok apa-apa produk pengganti tembakau; atau

(b) boleh menggunakan apa-apa peranti merokok dengan apa-apa bahan merokok.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi lima ratus ringgit atau diperintahkan untuk melaksanakan suatu perintah khidmat masyarakat menurut Kanun Tatacara Jenayah atau Akta Kanak-Kanak 2001.

**Tanggungjawab tuan punya bangunan, dsb.**

**20.** (1) Tuan punya atau penghuni apa-apa kawasan atau tempat larangan merokok yang diisytiharkan di bawah seksyen 17—

(a) hendaklah mempamerkan suatu tanda amaran larangan merokok dalam bentuk sebagaimana yang ditetapkan;

(b) tidak boleh mengadakan apa-apa kelengkapan atau kemudahan merokok atau apa-apa cara yang dihasratkan untuk menggalakkan mana-mana orang untuk merokok; atau

(c) hendaklah mengambil semua langkah yang munasabah sebagaimana yang ditentukan oleh Ketua Pengarah untuk menghalang mana-mana orang daripada merokok di dalam bangunan atau kenderaan itu, atau di tempat atau kawasan itu.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi lima ribu ringgit.



## BAHAGIAN VII

### LIABILITI PENGILANG, PENGIMPORT DAN PENGEDAR

#### **Anggapan perkara berkaitan dengan pelabelan dan pembungkusan**

**21.** Dalam apa-apa prosiding di bawah Akta ini, apa-apa keterangan bahawa suatu bungkusan yang mengandungi apa-apa produk tembakau, bahan merokok, produk pengganti tembakau atau peranti merokok yang mengandungi nama, alamat atau tanda berdaftar seorang pengimport, pengilang atau pengedar, atau pemunya hak pengilang, pembungkus, atau seorang ejen mana-mana daripada mereka, hendaklah menjadi keterangan *prima facie* bahawa produk tembakau, bahan merokok, produk pengganti tembakau atau peranti merokok itu diimport, dikilangkan atau dibungkuskan, mengikut mana-mana yang berkenaan, oleh setiap seorang daripada orang yang namanya, alamatnya atau tanda berdaftarnya ditunjukkan pada bungkusan itu.

#### **Tanggungjawab pengilang, pengimport atau pengedar**

**22.** (1) Tiap-tiap pengilang, pengimport atau pengedar suatu produk tembakau, bahan merokok, produk pengganti tembakau atau peranti merokok hendaklah mengadakan apa-apa maklumat sebagaimana yang ditentukan oleh Ketua Pengarah atau mana-mana pegawai diberi kuasa berhubung dengan produk tembakau, bahan merokok, produk pengganti tembakau atau peranti merokok itu.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan, didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya; atau

(b) sekiranya orang itu ialah suatu pertubuhan perbadanan, didenda tidak kurang dari sepuluh ribu ringgit dan tidak melebihi lima puluh ribu ringgit atau dipenjarakan selama tempoh tidak melebihi satu tahun atau kedua-duanya.

## BAHAGIAN VIII

## PENTADBIRAN

**Situasi akut atau kritikal**

23. (1) Menteri boleh, atas nasihat Ketua Pengarah bahawa terdapat situasi akut atau kritikal yang berhubungan dengan kegunaan atau penggunaan apa-apa produk tembakau, bahan merokok atau produk pengganti tembakau yang boleh secara serius membahayakan nyawa, kesihatan atau keselamatan mana-mana penduduk dalam mana-mana bahagian negara, menubuhkan suatu jawatankuasa, dengan secepat yang semunasabahnya dapat dilaksanakan, untuk menyelaraskan dan menasihatnya mengenai perkara itu.

(2) Jika Menteri berpuas hati bahawa terdapat situasi akut atau kritikal yang secara serius membahayakan nyawa, kesihatan atau keselamatan penduduk, Menteri boleh, atas syor jawatankuasa yang ditubuhkan di bawah subseksyen (1), melalui perintah yang disiarkan dalam *Warta*, melarang atau menyekat, tertakluk kepada apa-apa syarat yang difikirkannya patut, pengimportan, pengilangan, pengedaran atau penjualan produk tembakau, bahan merokok atau produk pengganti tembakau itu.

(3) Mana-mana orang yang melanggar subseksyen (2) melakukan suatu kesalahan dan boleh, apabila disabitkan—

(a) sekiranya orang itu bukan suatu pertubuhan perbadanan—

- (i) bagi kesalahan pertama, didenda tidak melebihi dua puluh ribu ringgit atau dipenjarakan selama tempoh tidak melebihi satu tahun atau kedua-duanya; dan
- (ii) bagi kesalahan kedua atau berikutnya, didenda tidak melebihi tiga puluh ribu ringgit atau dipenjarakan selama tempoh tidak melebihi dua tahun atau kedua-duanya; dan

(b) sekiranya orang itu ialah suatu pertubuhan perbadanan—

- (i) bagi kesalahan pertama, didenda tidak kurang daripada dua puluh ribu ringgit dan tidak melebihi satu ratus ribu ringgit atau dipenjarakan selama tempoh tidak melebihi dua tahun atau kedua-duanya; dan

- (ii) bagi kesalahan kedua atau berikutnya, didenda tidak kurang daripada lima puluh ribu ringgit dan tidak melebihi tiga ratus ribu ringgit atau dipenjarakan selama tempoh tidak melebihi tiga tahun atau kedua-duanya.

### **Pelantikan juruanalisis**

**24.** (1) Menteri boleh melantik mana-mana orang untuk menjadi juruanalisis bagi maksud Akta ini.

(2) Pelantikan juruanalisis yang dibuat di bawah subseksyen (1) hendaklah disiarkan dalam *Warta*.

### **Makmal yang diluluskan**

**25.** (1) Menteri boleh, melalui perintah yang disiarkan dalam *Warta*, meluluskan seberapa jumlah makmal bagi maksud Akta ini.

(2) Mana-mana makmal yang diluluskan di bawah subseksyen (1) hendaklah dikeluarkan suatu perakuan kelulusan yang dalam apa-apa prosiding undang-undang di bawah Akta ini, hendaklah boleh diterima dalam keterangan sebagai bukti *prima facie* bagi fakta yang dinyatakan dalam perakuan itu.

(3) Menteri hendaklah menyediakan atau menyebabkan disediakan suatu senarai makmal yang diluluskan dan Menteri boleh mengubah senarai itu sebagaimana hal keadaan memerlukan.

### **Pelantikan pegawai diberi kuasa**

**26.** (1) Menteri boleh melantik seberapa ramai pegawai diberi kuasa sebagaimana yang difikirkannya perlu bagi maksud Akta ini.

(2) Mana-mana pegawai diberi kuasa yang dilantik di bawah subseksyen (1) hendaklah dikeluarkan suatu perakuan pemberian kuasa yang dalam apa-apa prosiding undang-undang di bawah Akta ini, boleh diterima dalam keterangan sebagai bukti *prima facie* bagi fakta yang dinyatakan dalam perakuan itu.

(3) Seseorang pegawai diberi kuasa hendaklah, apabila bertindak dalam bidang kuasa dan kewajibannya di bawah Akta ini, disifatkan sebagai seorang pekhidmat awam mengikut pengertian Kanun Keseksaan [*Akta 574*].

## BAHAGIAN IX

### PENGUATKUASAAN

#### **Kuasa penyasatan**

**27.** Seseorang pegawai diberi kuasa hendaklah mempunyai kuasa seorang pegawai polis yang apa jua pun pangkatnya sebagaimana yang diperuntukkan di bawah Kanun Tatacara Jenayah berhubung dengan penyasatan, dan kuasa itu hendaklah sebagai tambahan kepada kuasa yang diperuntukkan di bawah Akta ini dan bukannya pengurangan.

#### **Kuasa untuk memasuki premis**

**28.** Sekiranya pegawai diberi kuasa semunasabahnya percaya bahawa mana-mana premis digunakan atau mungkin digunakan bagi maksud pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok, produk pengganti tembakau atau peranti merokok atau apa-apa produk tembakau, bahan merokok, produk pengganti tembakau atau peranti merokok tiruan, pegawai diberi kuasa hendaklah mempunyai kuasa untuk memasuki mana-mana premis pada bila-bila masa yang munasabah bagi maksud—

- (a) memeriksa apa-apa produk tembakau, bahan merokok, produk pengganti tembakau, peranti merokok atau apa-apa produk tembakau, bahan merokok, produk pengganti tembakau atau peranti merokok tiruan;
- (b) memeriksa apa-apa barang atau kelengkapan yang pegawai diberi kuasa semunasabahnya percaya digunakan atau boleh digunakan bagi pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok, produk pengganti tembakau, peranti merokok atau apa-apa produk tembakau, bahan merokok, produk pengganti tembakau atau peranti merokok tiruan;

- (c) mengumpul apa-apa sampel produk tembakau, bahan merokok atau produk pengganti tembakau; atau
- (d) memeriksa dan menyita apa-apa dokumen yang dijumpai dalam mana-mana premis yang pegawai diberi kuasa percaya bahawa dokumen itu mengandungi apa-apa maklumat berhubung dengan apa-apa produk tembakau, bahan merokok, produk pengganti tembakau, peranti merokok atau apa-apa produk tembakau, bahan merokok, produk pengganti tembakau atau peranti merokok tiruan.

### **Kuasa untuk mengambil sampel**

**29.** (1) Setelah pembayaran kepada mana-mana orang yang menjual produk tembakau, bahan merokok atau produk pengganti tembakau atau kepada ejen atau pekerjanya, pada nilai pasaran semasa bagi produk tembakau, bahan merokok atau produk pengganti tembakau itu, mana-mana pegawai diberi kuasa boleh di tempat yang produk tembakau, bahan merokok atau produk pengganti tembakau itu dijual meminta dan memilih dan mengambil atau memperoleh sampel produk tembakau, bahan merokok atau produk pengganti tembakau itu bagi maksud analisis.

(2) Seseorang pegawai diberi kuasa boleh, di tempat yang pegawai diberi kuasa semunasabahnya percaya digunakan atau boleh digunakan bagi maksud pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok atau produk pengganti tembakau itu, meminta dan memilih dan mengambil atau memperoleh sampel produk tembakau, bahan merokok atau produk pengganti tembakau itu bagi maksud analisis tanpa bayaran daripada mana-mana pengimport, pengilang atau pengedar atau daripada ejen atau pekerjanya.

(3) Mana-mana orang yang enggan atau cuai untuk mematuhi apa-apa permintaan yang dibuat di bawah subseksyen (1) atau (2) melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya.

**Tatacara mengambil sampel**

**30.** (1) Jika apa-apa sampel bagi apa-apa produk tembakau, bahan merokok atau produk pengganti tembakau dikehendaki bagi maksud apa-apa analisis, pegawai diberi kuasa yang membeli sampel itu mengikut subseksyen 29(1) atau selainnya memperoleh sampel itu mengikut subseksyen 29(2), hendaklah memberitahu kepada penjual atau ejen atau pekerjanya yang menjual produk tembakau, bahan merokok atau produk pengganti tembakau itu atau kepada pengimport, pengilang atau pengedar atau ejen atau pekerjanya bahawa dia bermaksud sampel itu dianalisis oleh seorang juruanalisis.

(2) Tatacara untuk mengambil dan berurusan dengan sampel itu hendaklah sebagaimana yang ditentukan oleh Ketua Pengarah.

**Anggapan**

**31.** Apabila apa-apa produk tembakau, bahan merokok atau produk pengganti tembakau disyaki telah melanggar peruntukan Akta ini telah diperoleh menurut seksyen 29 atau telah disita menurut seksyen 34, 35 atau 37, dari tempat yang pegawai diberi kuasa semunasabahnya percaya digunakan atau boleh digunakan bagi maksud pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok atau produk pengganti tembakau itu dan produk tembakau, bahan merokok atau produk pengganti tembakau itu terkandung dalam beberapa bekas, adalah mencukupi untuk menganalisis sampel kandungan itu tidak kurang daripada sepuluh peratus daripada bekas itu dan jika analisis itu membuktikan bahawa kesemua sampel itu adalah daripada sifat dan perihalan yang sama, maka hendaklah dianggap, sehingga dibuktikan sebaliknya, bahawa kandungan semua bekas itu adalah daripada sifat dan perihalan yang sama sebagaimana sampel yang dianalisis dan jika analisis itu menunjukkan bahawa sampel itu terdiri daripada atau mengandungi produk tembakau, bahan merokok atau produk pengganti tembakau, maka hendaklah dianggap, sehingga dibuktikan sebaliknya, bahawa kandungan semua bekas itu terdiri daripada atau mengandungi peratusan yang sama dengan produk tembakau, bahan merokok atau produk pengganti tembakau itu.

**Kuasa untuk membuka bungkusan dan memeriksa produk tembakau, dsb.**

**32.** Bagi maksud Akta ini, seseorang pegawai diberi kuasa boleh membuka, di tempat yang pegawai diberi kuasa semunasabahnya percaya digunakan atau boleh digunakan bagi maksud pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok atau produk pengganti tembakau, atau produk tembakau, bahan merokok, atau produk pengganti tembakau tiruan, apa-apa bagasi, bungkusan, atau apa-apa bekas lain dan boleh memeriksa apa-apa produk tembakau, bahan merokok, produk pengganti tembakau, peranti merokok atau produk tembakau, bahan merokok, produk pengganti tembakau atau peranti merokok tiruan yang terkandung dalamnya, dan bagi maksud pemeriksaan itu membawa barang yang sama itu ke pejabat pegawai diberi kuasa.

**Kuasa untuk memberhentikan, menggeledah dan menyita pengangkut**

**33.** (1) Sekiranya seseorang pegawai diberi kuasa mempunyai sebab yang munasabah untuk mengesyaki bahawa mana-mana pengangkut sedang membawa apa-apa produk tembakau, bahan merokok, produk pengganti tembakau, peranti merokok, jentera, kelengkapan, buku, rekod, dokumen atau apa-apa artikel lain yang berkenaan dengannya suatu kesalahan di bawah Akta ini kecuali bagi kesalahan di bawah seksyen 18 atau 19, sedang atau telah dilakukan, pegawai itu boleh memberhentikan dan menggeledah pengangkut itu dan boleh, jika semasa pemeriksaan itu dia mempunyai sebab yang munasabah untuk mempercayai bahawa pengangkut itu sedang atau telah digunakan bagi pelakuan kesalahan itu, menyita pengangkut itu dan mana-mana produk tembakau, bahan merokok, produk pengganti tembakau, peranti merokok, jentera, kelengkapan, buku, rekod, dokumen atau apa-apa artikel lain yang dijumpai dalam pengangkut itu yang semunasabahnya dipercayai dapat memberikan keterangan mengenai pelakuan kesalahan itu.

(2) Orang yang mempunyai kawalan atau bertanggungjawab ke atas pengangkut itu hendaklah, jika dikehendaki berbuat demikian oleh pegawai diberi kuasa—

- (a) memberhentikan pengangkut itu dan membenarkan pegawai diberi kuasa untuk menggeledah pengangkut itu; dan
- (b) membuka semua bahagian pengangkut itu bagi penggeledahan dan mengambil semua langkah yang perlu untuk membolehkan atau memudahkan penggeledahan itu dijalankan sebagaimana yang difikirkan perlu oleh pegawai diberi kuasa itu.

(3) Mana-mana orang yang melanggar subseksyen (2) melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya.

### **Pengeledahan dan penyitaan dengan waran**

**34.** (1) Jika seseorang Majistret mendapati, berdasarkan maklumat bertulis dengan bersumpah daripada pegawai diberi kuasa dan selepas apa-apa siasatan sebagaimana yang difikirkannya perlu, bahawa terdapat sebab yang munasabah untuk mempercayai bahawa—

- (a) mana-mana premis telah digunakan untuk atau akan digunakan bagi; atau
- (b) terdapat dalam mana-mana premis keterangan yang perlu bagi pengendalian suatu penyiasatan mengenai,

pelakuan suatu kesalahan di bawah Akta ini atau mana-mana peraturan-peraturan yang dibuat di bawah Akta ini, Majistret itu boleh mengeluarkan suatu waran yang memberi kuasa kepada mana-mana pegawai diberi kuasa yang dinamakan dalam waran itu, untuk memasuki premis itu pada bila-bila masa yang munasabah pada waktu siang atau malam, dan dengan atau tanpa bantuan, dan jika perlu dengan kekerasan.



(2) Tanpa menjejaskan keluasan subseksyen (1), waran yang dikeluarkan oleh Majistret boleh memberikan kuasa kepada pegawai diberi kuasa itu untuk—

- (a) menyita atau mengambil sampel apa-apa produk tembakau, bahan merokok, produk pengganti tembakau atau benda lain; atau
- (b) menyita apa-apa dokumen, rekod, manual, buku, bahan atau artikel lain atau membuat salinan atau cabutan daripada dokumen, rekod, manual, buku, bahan atau artikel lain itu.

(3) Seseorang pegawai diberi kuasa yang menjalankan penggeledahan di bawah subseksyen (1) boleh, bagi maksud menyiasat kesalahan itu, memeriksa mana-mana orang yang berada di dalam atau di premis itu.

(4) Tiada seorang pun boleh diperiksa kecuali oleh seorang lain yang sama jantina, dan pemeriksaan itu hendaklah dijalankan dengan mengambil kira dengan tegas tentang kesopanan.

(5) Seseorang pegawai diberi kuasa boleh, dalam menjalankan kuasanya di bawah seksyen ini, jika perlu untuk berbuat demikian—

- (a) memecah buka mana-mana pintu luar atau dalam premis itu atau mana-mana pagar, kepungan, pintu pagar atau halangan lain kepada premis itu, untuk masuk ke dalam premis itu;
- (b) memindahkan dengan kekerasan apa-apa halangan kepada kemasukan, penggeledahan, penyitaan dan pemindahan sebagaimana dia diberi kuasa untuk melaksanakannya di bawah seksyen ini; dan
- (c) menahan mana-mana orang yang dijumpai di dalam premis sehingga penggeledahan itu selesai.

(6) Jika, oleh sebab sifat, saiz atau amaunnya, adalah tidak praktikal untuk memindahkan apa-apa bekas, bungkusan, pengangkut, buku, dokumen atau lain-lain benda yang disita di bawah seksyen ini, pegawai diberi kuasa hendaklah mengelak pengangkut, kontena atau premis yang bekas, bungkusan, buku, dokumen dan lain-lain benda itu dijumpai.

(7) Mana-mana orang yang, tanpa kuasa yang sah, memecahkan, mengganggu atau merosakkan lak yang disebut dalam subseksyen (6) atau memindahkan apa-apa bekas, bungkusan, pengangkut, buku, dokumen atau lain-lain benda yang disita dengan dilak atau cuba berbuat demikian, melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya.

### **Pengeledahan dan penyitaan tanpa waran**

**35.** Sekiranya seseorang pegawai diberi kuasa mempunyai sebab yang munasabah untuk mempercayai bahawa mana-mana premis digunakan atau mungkin digunakan bagi maksud pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok atau produk pengganti tembakau atau apa-apa produk tembakau, bahan merokok atau produk pengganti tembakau tiruan dan oleh sebab kelengahan dalam memperoleh suatu waran geledah di bawah seksyen 34—

- (a) penyiasatan itu akan terjejas;
- (b) tujuan kemasukan itu akan terkecewa;
- (c) produk tembakau, bahan merokok atau produk pengganti tembakau atau apa-apa produk tembakau, bahan merokok atau produk pengganti tembakau tiruan, artikel atau benda lain yang dicari boleh dipindahkan atau diganggu; atau
- (d) keterangan yang dicari itu boleh diganggu atau dimusnahkan,

pegawai itu boleh memasuki premis itu dan menjalankan berkenaan dengan premis itu, semua kuasa yang disebut dalam seksyen 34 dengan cara yang sepenuhnya dan secukupnya seolah-olah pegawai itu telah diberi kuasa untuk berbuat demikian oleh suatu waran yang dikeluarkan di bawah seksyen itu.

### **Akses kepada maklumat berekod, data berkomputer, dsb.**

**36.** (1) Mana-mana pegawai diberi kuasa yang menjalankan kuasanya di bawah Akta ini, kecuali bagi siasatan suatu kesalahan di bawah seksyen 18 atau 19, hendaklah diberi akses kepada apa-apa maklumat berekod atau data berkomputer yang berhubungan

dengan pengilangan, pembungkusan, penyimpanan, penyerahan, pengedaran atau penjualan apa-apa produk tembakau, bahan merokok atau produk pengganti tembakau, atau apa-apa produk tembakau, bahan merokok atau produk pengganti tembakau tiruan, sama ada yang disimpan dalam komputer atau selainnya.

(2) Dalam menjalankan kuasanya, pegawai diberi kuasa—

(a) boleh memeriksa dan meneliti pengendalian apa-apa komputer dan apa-apa radas atau bahan yang berkaitan yang pegawai diberi kuasa itu mempunyai sebab yang munasabah untuk mengesyaki sedang atau telah digunakan berkaitan dengan maklumat atau data itu;

(b) boleh menghendaki—

(i) orang, yang pegawai diberi kuasa itu mempunyai sebab yang munasabah untuk mengesyaki bahawa orang itu sedang menggunakan atau telah menggunakan komputer itu berkaitan dengan maklumat atau data itu;

(ii) orang, yang pegawai diberi kuasa itu mempunyai sebab yang munasabah untuk mengesyaki bahawa komputer itu sedang digunakan atau telah digunakan, bagi pihak orang itu, berkaitan dengan maklumat atau data itu; atau

(iii) orang yang bertanggungjawab bagi, atau selainnya terlibat dengan, pengendalian komputer, radas atau bahan itu,

untuk memberikan apa-apa bantuan yang munasabah kepadanya sebagaimana yang dikehendaknya bagi maksud seksyen ini.

(3) Pegawai diberi kuasa boleh membuat salinan atau mengambil cabutan daripada maklumat berekod atau data berkomputer, jika difikirkannya perlu.

(4) Bagi maksud seksyen ini, “akses” termasuklah diberi kata laluan, kod penyulitan, kod penyahsulitan, perisian atau perkakasan yang perlu dan apa-apa cara lain yang dikehendaki untuk membolehkan pemahaman maklumat berekod atau data berkomputer itu.

### **Penyitaan benda, dsb.**

**37.** (1) Apa-apa produk tembakau, bahan merokok atau produk pengganti tembakau atau produk tembakau, bahan merokok atau produk pengganti tembakau tiruan, pengangkut, jentera, kelengkapan, buku, rekod, dokumen, artikel atau benda lain yang pegawai diberi kuasa semunasabahnya mengesyaki telah digunakan atau akan digunakan dalam pelakuan apa-apa kesalahan di bawah Akta ini bolehlah disita dan ditahan oleh pegawai diberi kuasa itu.

(2) Apabila tiada orang dituduh bagi apa-apa kesalahan, benda yang disita itu hendaklah, melainkan jika dituntut oleh pemunya atau orang yang daripadanya benda itu disita dalam tempoh tiga puluh hari daripada penyitaan itu, dilupuskan mengikut budi bicara Ketua Pengarah atau pegawai diberi kuasa tetapi jika dalam tempoh itu suatu tuntutan dibuat oleh pemunya atau mana-mana orang yang daripadanya benda itu disita, benda yang disita itu hendaklah dipulangkan kepadanya.

(3) Sekiranya apa-apa benda yang disita pada menjalankan kuasa yang diberikan di bawah Akta ini daripada jenis yang mudah musnah atau mengikut tabiinya lekas rosak, Ketua Pengarah boleh mengarahkan supaya benda itu dijual atau dimusnahkan pada bila-bila masa, dan hasil jualan itu dipegang oleh pegawai diberi kuasa sementara menanti keputusan apa-apa pendakwaan di bawah Akta ini atau tuntutan di bawah seksyen ini.

### **Senarai benda yang disita**

**38.** (1) Jika apa-apa penyitaan dibuat di bawah Bahagian ini, pegawai diberi kuasa yang membuat penyitaan itu hendaklah menyediakan suatu senarai produk tembakau, bahan merokok, produk pengganti tembakau, pengangkut, jentera, kelengkapan, buku, rekod, dokumen, artikel atau benda lain yang disita dan mengenai premis yang di dalamnya ia dijumpai dan hendaklah menandatangani senarai itu.

(2) Senarai yang disediakan mengikut subseksyen (1) hendaklah diserahkan dengan serta-merta kepada—

- (a) penghuni premis yang apa-apa produk tembakau, bahan merokok atau produk pengganti tembakau, pengangkut, jentera, kelengkapan, buku, rekod, dokumen, artikel atau benda lain yang disita itu dijumpai; dan
- (b) orang yang mempunyai kawalan atau bertanggungjawab ke atas pengangkut itu, jika penyitaan itu dibuat di bawah seksyen 33.

(3) Jika penyitaan itu dibuat di dalam atau dari mana-mana premis yang tidak berpenghuni, pegawai diberi kuasa hendaklah bilamana mungkin menampal suatu senarai benda yang disita di tempat yang mudah dilihat di premis itu.

#### **Pemulangan sementara pengangkut, dsb.**

**39.** Jika apa-apa pengangkut, jentera atau kelengkapan disita di bawah Akta ini, mahkamah boleh pada bila-bila masa memerintahkan pemulangan sementara pengangkut, jentera atau kelengkapan itu kepada pemunya pengangkut, jentera atau kelengkapan atau orang yang daripada milikan, jagaan atau kawalannya ia disita, tertakluk kepada terma dan syarat sebagaimana yang mahkamah boleh kenakan, dan tertakluk dalam mana-mana hal, kepada jaminan yang mencukupi diberikan sehingga memuaskan hati mahkamah bahawa pengangkut, jentera atau kelengkapan itu akan diserahkan balik kepada mahkamah apabila diminta dan bahawa terma dan syarat itu, jika ada, akan dipatuhi.

#### **Kos memegang produk tembakau yang disita, dsb.**

**40.** (1) Jika mana-mana produk tembakau, bahan merokok, produk pengganti tembakau atau apa-apa produk tembakau, bahan merokok, produk pengganti tembakau tiruan, pengangkut, jentera, kelengkapan atau artikel disita atau diserahkan di bawah Akta ini dipegang dalam jagaan pegawai diberi kuasa sementara menunggu penyelesaian apa-apa prosiding berkenaan dengan suatu kesalahan di bawah Akta ini, kos untuk memegangnya dalam jagaan hendaklah boleh didapatkan semula sebagai suatu hutang sivil yang kena dibayar kepada Kerajaan.

(2) Kerajaan tidaklah bertanggung kepada mana-mana orang bagi apa-apa kemerosotan kualiti mana-mana produk tembakau, bahan merokok, produk pengganti tembakau atau apa-apa produk tembakau, bahan merokok atau produk pengganti tembakau tiruan, pengangkut, jentera, kelengkapan atau artikel, yang disita atau diserahkan di bawah Akta ini.

### **Kuasa untuk menghendaki kehadiran orang yang mempunyai pengetahuan tentang kes**

**41.** (1) Seseorang pegawai diberi kuasa yang membuat penyiataan di bawah Akta ini boleh, melalui perintah secara bertulis, menghendaki kehadiran di hadapannya mana-mana orang yang pada hematnya mempunyai pengetahuan tentang fakta dan hal keadaan kes itu, dan orang itu hendaklah hadir sebagaimana yang dikehendaki.

(2) Jika orang itu enggan atau tidak hadir sebagaimana yang dikehendaki oleh suatu perintah yang dibuat di bawah subseksyen (1), pegawai diberi kuasa boleh melaporkan keengganan atau ketidakhadiran itu kepada seorang Majistret yang hendaklah mengeluarkan suatu waran untuk memastikan kehadiran orang itu sebagaimana yang dikehendaki oleh perintah itu.

### **Pemeriksaan orang yang mempunyai pengetahuan tentang kes**

**42.** (1) Seorang pegawai diberi kuasa yang membuat penyiataan di bawah Akta ini boleh memeriksa secara lisan mana-mana orang yang dikatakan mempunyai pengetahuan tentang fakta dan hal keadaan kes.

(2) Orang itu terikat untuk menjawab semua soalan yang berhubungan dengan kes itu yang dikemukakan kepadanya oleh pegawai diberi kuasa, tetapi orang itu boleh enggan untuk menjawab apa-apa soalan yang jawapannya mungkin mendedahkannya pada suatu pertuduhan jenayah, penalti atau pelucuthakan.

(3) Seseorang yang membuat pernyataan di bawah seksyen ini terikat di sisi undang-undang untuk menyatakan yang benar, sama ada atau tidak pernyataan itu dibuat secara keseluruhannya atau sebahagiannya untuk menjawab soalan.

(4) Pegawai diberi kuasa yang memeriksa seseorang di bawah subseksyen (1) hendaklah terlebih dahulu memaklumkan kepada orang itu mengenai peruntukan subseksyen (2) dan (3).

(5) Suatu pernyataan yang dibuat oleh mana-mana orang di bawah seksyen ini hendaklah, bilamana mungkin, diubah ke dalam bentuk bertulis dan ditandatangani oleh orang yang membuat pernyataan itu atau dilekatkan cap ibu jarinya, mengikut mana-mana yang berkenaan, selepas—

- (a) pernyataan itu dibacakan kepadanya dalam bahasa yang dalamnya pernyataan itu dibuat olehnya; dan
- (b) orang itu diberi peluang untuk membuat apa-apa pembetulan yang ingin dibuat.

## BAHAGIAN X

### PERBICARAAN DAN PROSIDING

#### **Pendakwaan**

**43.** Tiada pendakwaan bagi atau berhubung dengan apa-apa kesalahan di bawah Akta ini atau mana-mana peraturan-peraturan yang dibuat di bawah Akta ini boleh dimulakan kecuali oleh atau dengan keizinan bertulis Pendakwa Raya.

#### **Notis terlebih dahulu tentang keterangan pakar dalam mahkamah**

**44.** Dalam apa-apa prosiding bagi sesuatu kesalahan di bawah Akta ini, tiada keterangan pakar boleh diterima sebagai keterangan melainkan jika, dalam tempoh yang berakhir sepuluh hari genap sebelum perbicaraan, orang yang dituduh dengan kesalahan itu telah menyampaikan kepada pendakwaan suatu notis bertulis bahawa dia bermaksud untuk mengemukakan keterangan pakar, dan hendaklah menzahirkan dalam notis itu nama pakar dan sifat keterangan pakar itu, dan hendaklah juga memberikan sesalinan apa-apa dokumen yang hendak dikemukakan oleh pakar itu dalam perbicaraan itu.

**Bidang kuasa untuk membicarakan kesalahan**

**45.** Walau apa pun apa-apa undang-undang bertulis yang berlawanan, mahkamah Majistret Kelas Pertama hendaklah mempunyai bidang kuasa untuk membicarakan apa-apa kesalahan di bawah Akta ini dan mengenakan hukuman bagi apa-apa kesalahan di bawah Akta ini.

**Perlindungan kepada pemberi maklumat**

**46.** (1) Kecuali sebagaimana yang diperuntukkan dalam subseksyen (2) dan (3), tiada saksi dalam mana-mana prosiding sivil atau jenayah berkewajipan atau dibenarkan untuk menzahirkan nama, alamat atau apa-apa maklumat mengenai pemberi maklumat, atau bahan maklumat yang diterima daripadanya atau menyatakan apa-apa perkara yang mungkin membawa kepada pemberi maklumat itu diketahui.

(2) Jika mana-mana buku, rekod, akaun, dokumen atau data berkomputer dikemukakan sebagai keterangan atau yang boleh diperiksa dalam mana-mana prosiding sivil atau jenayah mengandungi apa-apa catatan yang dalamnya mana-mana pemberi maklumat dinamakan atau diperihalkan atau yang mungkin membawa kepada dirinya diketahui, mahkamah hendaklah menyebabkan supaya semua petikan itu disembunyikan daripada pandangan atau dipadamkan setakat yang perlu untuk melindungi pemberi maklumat itu daripada diketahui.

(3) Jika dalam perbicaraan bagi apa-apa kesalahan di bawah Akta ini, mahkamah, selepas pemeriksaan penuh tentang kes itu mempercayai bahawa pemberi maklumat itu dengan sengaja membuat dalam aduannya suatu pernyataan material yang diketahuinya sebagai palsu atau tidak dipercayainya sebagai benar, atau jika dalam apa-apa prosiding lain mahkamah berpendapat bahawa keadilan tidak boleh dilaksanakan sepenuhnya antara pihak-pihak dalam prosiding itu tanpa pemberi maklumat itu diketahui, adalah sah bagi mahkamah untuk menghendaki pengemukaan aduan asal, jika secara bertulis, dan membenarkan pemeriksaan dan menghendaki penzahiran penuh, berkenaan dengan pemberi maklumat itu.



### **Keterangan ejen provokasi boleh diterima**

**47.** (1) Walau apa pun mana-mana rukun undang-undang atau peruntukan Akta ini atau mana-mana undang-undang bertulis lain yang berlawanan, tiada ejen provokasi boleh dianggap tidak boleh dipercayai hanya oleh sebab dia telah cuba bersubahat atau telah bersubahat dalam melakukan suatu kesalahan oleh mana-mana orang di bawah Akta ini jika cubaan bersubahat atau persubahatan itu semata-mata bagi maksud mendapatkan keterangan terhadap orang itu.

(2) Walau apa pun mana-mana rukun undang-undang atau peruntukan Akta ini atau mana-mana undang bertulis lain yang berlawanan, dan ejen provokasi itu adalah seorang pegawai diberi kuasa, apa-apa pernyataan, sama ada lisan atau bertulis, yang dibuat kepada ejen provokasi oleh mana-mana orang yang kemudiannya dipertuduh atas suatu kesalahan di bawah Akta ini boleh diterima sebagai keterangan semasa perbicaraannya.

### **Tiada penzahiran maklumat**

**48.** Tiada apa pun dalam Akta ini atau dalam mana-mana peraturan-peraturan yang dibuat di bawah Akta ini boleh menghendaki mana-mana pegawai diberi kuasa untuk menzahirkan fakta atau mengemukakan dokumen yang didapatinya—

- (a) bertentangan dengan kepentingan awam untuk dizahirkan atau dikemukakan; atau
- (b) akan menjejaskan perlindungan seorang saksi.

### **Kuasa untuk memerintahkan kehadiran ke mahkamah**

**49.** (1) Jika Ketua Pengarah atau mana-mana pegawai diberi kuasa mempunyai alasan yang munasabah untuk dipercayai bahawa mana-mana orang telah melakukan suatu kesalahan di bawah Akta ini, dia boleh, sebagai ganti membuat permohonan kepada mahkamah untuk mendapatkan suatu saman, dengan serta-merta menyampaikan kepada orang itu suatu notis yang memerintahkan orang itu supaya hadir di hadapan mahkamah Majistret yang paling hampir yang mempunyai bidang kuasa untuk membicarakan kesalahan itu, pada masa dan tarikh yang dinyatakan dalam notis itu.

(2) Jika mana-mana orang yang disampaikan suatu notis sebagaimana yang diperuntukkan oleh subseksyen (1) tidak hadir secara sendiri atau melalui peguam, mahkamah boleh, jika berpuas hati bahawa notis telah disampaikan, mengeluarkan suatu waran bagi menangkap orang itu melainkan jika didapati adalah tidak semunasabahnya mungkin bagi orang itu untuk hadir sedemikian.

(3) Notis di bawah subseksyen (1) hendaklah sebagaimana yang ditetapkan.

## BAHAGIAN XI

### AM

#### **Pengkompunan kesalahan**

**50.** (1) Menteri boleh, dengan kelulusan Pendakwa Raya, membuat peraturan-peraturan yang menetapkan—

(a) apa-apa kesalahan di bawah Akta ini atau mana-mana peraturan-peraturan yang dibuat di bawah Akta ini sebagai suatu kesalahan yang boleh dikompau; dan

(b) kaedah dan tatacara untuk mengkompau kesalahan itu.

(2) Ketua Pengarah atau mana-mana pegawai diberi kuasa oleh Ketua Pengarah boleh, dengan keizinan bertulis Pendakwa Raya, pada bila-bila masa sebelum suatu pertuduhan dimulakan, mengkompau mana-mana kesalahan yang ditetapkan sebagai suatu kesalahan yang boleh dikompau dengan membuat suatu tawaran bertulis kepada orang yang disyaki dengan munasabah telah melakukan kesalahan itu untuk mengkompau kesalahan apabila dibayar kepada Ketua Pengarah suatu jumlah wang tidak melebihi lima puluh peratus daripada amaun maksimum denda yang orang itu boleh dikenakan jika dia disabitkan dengan kesalahan itu, dalam apa-apa masa sebagaimana yang dinyatakan dalam tawaran bertulis itu.

(3) Suatu tawaran di bawah subseksyen (2) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan.

(4) Jika amaun yang dinyatakan dalam tawaran itu tidak dibayar dalam masa yang dinyatakan dalam tawaran itu, atau apa-apa lanjutan masa sebagaimana yang diberikan oleh Ketua Pengarah, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu dibuat.

(5) Jika suatu kesalahan telah dikompaun di bawah seksyen ini—

(a) tiada pendakwaan boleh dimulakan berkenaan dengan kesalahan itu terhadap orang yang kepadanya tawaran untuk mengkompaun itu dibuat; dan

(b) apa-apa dokumen atau benda yang disita yang berkaitan dengan kesalahan boleh dilepaskan oleh Ketua Pengarah, tertakluk kepada terma sebagaimana yang difikirkan patut oleh Ketua Pengarah.

(6) Semua jumlah wang yang diterima oleh Ketua Pengarah atau pegawai diberi kuasa di bawah seksyen ini hendaklah dibayar ke dalam dan menjadi sebahagian daripada Kumpulan Wang Disatukan Persekutuan.

### **Kesalahan oleh pertubuhan perbadanan**

**51.** (1) Jika mana-mana pertubuhan perbadanan melakukan suatu kesalahan di bawah Akta ini, orang yang semasa melakukan kesalahan itu adalah seorang pengarah, pegawai pematuhan, pekongsi, pengurus, setiausaha atau pegawai lain yang seumpamanya bagi pertubuhan perbadanan itu atau yang bertindak atas apa-apa sifat itu atau dengan apa-apa cara atau sehingga apa-apa takat bertanggungjawab bagi pengurusan apa-apa hal ehwal pertubuhan perbadanan atau kumpulan orang atau membantu dalam pengurusannya—

(a) boleh dipertuduh secara berasingan atau bersesama dalam prosiding yang sama bersekali dengan pertubuhan perbadanan itu; dan

(b) jika pertubuhan perbadanan itu didapati bersalah atas kesalahan itu, hendaklah disifatkan bersalah atas kesalahan dan boleh dikenakan hukuman atau penalti yang sama sebagaimana seorang individu melainkan jika, dengan mengambil kira jenis fungsinya atas kapasiti itu dan semua hal keadaan, dia membuktikan—

(i) bahawa kesalahan itu telah dilakukan tanpa pengetahuannya; atau

(ii) bahawa kesalahan itu telah dilakukan tanpa persetujuannya atau pembiarannya dan bahawa dia telah mengambil semua langkah yang munasabah dan menjalankan usaha yang wajar untuk menghalang pelakuan kesalahan itu.

(2) Jika mana-mana orang boleh dikenakan di bawah Akta ini apa-apa hukuman, penalti atau pelucuthakan bagi apa-apa perbuatan, peninggalan, pengabaian atau keingkaran, dia boleh dikenakan hukuman, penalti atau pelucuthakan yang sama bagi tiap-tiap perbuatan, peninggalan, pengabaian atau keingkaran pekerja atau ejen orang itu, atau pekerja kepada ejen itu, jika perbuatan, peninggalan, pengabaian atau keingkaran itu telah dilakukan—

(a) oleh pekerja orang itu dalam masa penggajiannya;

(b) oleh ejen orang itu semasa bertindak bagi pihak orang itu; atau

(c) oleh pekerja ejen orang itu dalam masa penggajian pekerja itu oleh ejen itu atau selainnya bagi pihak ejen yang bertindak bagi pihak orang itu.

### **Perlindungan terhadap guaman dan prosiding undang-undang**

**52.** Tiada tindakan, guaman, pendakwaan atau prosiding lain boleh dibawa, dimulakan atau dikekalkan dalam mana-mana mahkamah terhadap mana-mana pegawai diberi kuasa atas sebab atau yang berkenaan dengan apa-apa perbuatan yang dilakukan atau yang ditinggalkan daripada dilakukan olehnya bagi maksud

menguatkuasakan Akta ini melainkan jika dibuktikan bahawa perbuatan itu dilakukan dan ditinggalkan daripada dilakukan dengan niat jahat dan tanpa kepercayaan yang munasabah bahawa perbuatan itu adalah perlu bagi maksud melaksanakan apa yang dimaksudkan olehnya.

### **Tanggung rugi**

**53.** (1) Kerajaan tidak boleh bertanggung untuk menggantikan apa-apa kerugian yang pemunya atau penghuni atau orang yang bertanggungjawab bagi mana-mana premis akibat daripada kemasukan, penggeledahan atau penyitaan di bawah Akta ini, melainkan jika kerosakan itu telah disebabkan oleh pengabaian atau kesalahan yang disengajakan oleh seorang pegawai awam.

(2) Jika berlaku apa-apa pertikaian tentang amaun pampasan berkenaan dengan apa-apa kerosakan yang disebabkan sedemikian, maka amaun pampasan itu hendaklah diputuskan dan ditentukan secara terus oleh suatu mahkamah Majistret.

### **Perwakilan kuasa**

**54.** (1) Ketua Pengarah boleh, secara bertulis, mewakili apa-apa kuasa, tanggungjawab atau fungsi Ketua Pengarah, selain kuasa di bawah seksyen 50, kepada mana-mana pegawai di bawah kawalan, arahan dan penyeliaan Ketua Pengarah tertakluk kepada apa-apa syarat, batasan atau sekatan yang difikirkan patut oleh Ketua Pengarah.

(2) Apa-apa perwakilan di bawah seksyen ini tidak menghalang Ketua Pengarah sendiri daripada melaksanakan atau menjalankan, pada bila-bila masa mana-mana kuasa, tanggungjawab atau fungsi yang diwakilkan itu.

### **Kuasa untuk membuat peraturan-peraturan**

**55.** (1) Menteri boleh membuat peraturan-peraturan yang perlu atau suai manfaat bagi maksud pelaksanaan peruntukan Akta ini.

(2) Tanpa menjejaskan keluasan makna subseksyen (1), Menteri boleh menetapkan—

- (a) semua perkara yang berhubungan dengan cara permohonan, pembatalan, penggantungan atau penarikan balik pendaftaran suatu produk tembakau, bahan merokok atau produk pengganti tembakau;
- (b) semua perkara yang berhubungan dengan butiran yang perlu diberikan oleh pemohon, cara kelulusan, terma, syarat dan sekatan pendaftaran yang akan dikenakan kepada pemohon;
- (c) semua fi yang dikehendaki oleh Akta ini untuk ditetapkan;
- (d) semua perkara yang berhubungan dengan larangan mengenai pengiklanan produk tembakau, bahan merokok, produk pengganti tembakau atau peranti merokok;
- (e) semua perkara yang berhubungan dengan larangan mengenai promosi atau tajaan produk tembakau, bahan merokok, produk pengganti tembakau atau peranti merokok;
- (f) semua perkara yang berhubungan dengan sekatan dan larangan mengenai penjualan produk tembakau, bahan merokok atau produk pengganti tembakau;
- (g) semua perkara yang berhubungan dengan harga runcit atau harga jualan minimum produk tembakau, bahan merokok atau produk pengganti tembakau;
- (h) semua perkara yang berhubungan dengan pembungkusan dan pelabelan produk tembakau, bahan merokok atau produk pengganti tembakau;
- (i) semua perkara yang berhubungan dengan kawasan atau tempat larangan merokok;
- (j) semua perkara yang berhubungan dengan larangan menjual, membeli, merokok atau menggunakan apa-apa produk tembakau, bahan merokok, produk pengganti tembakau atau peranti merokok oleh seseorang yang lahir pada 1 Januari 2007 dan seterusnya;

- (k) semua perkara yang berhubungan dengan larangan penjualan produk tembakau, bahan merokok, produk pengganti tembakau atau peranti merokok kepada seseorang yang lahir pada 1 Januari 2007 dan seterusnya;
- (l) semua perkara yang berhubungan dengan tatacara mengambil dan mengendalikan sampel dan analisis; dan
- (m) apa-apa perkara lain yang dikehendaki untuk ditetapkan oleh Akta ini.

(3) Mana-mana peraturan-peraturan yang dibuat di bawah subseksyen (1) boleh menetapkan apa-apa perbuatan atau peninggalan yang melanggar peraturan-peraturan itu menjadi suatu kesalahan dan boleh menetapkan hukuman denda yang tidak melebihi dua ratus ribu ringgit atau pemenjaraan selama tempoh tidak melebihi sepuluh tahun atau kedua-duanya bagi kesalahan itu.

### **Laporan berkala**

**56.** (1) Ketua Pengarah hendaklah, sebelum Januari 2025 dan pada setiap lima tahun selepas itu, menyebabkan supaya dibuat dan dihantar kepada Menteri suatu laporan mengenai—

- (a) keberkesanan larangan penjualan produk tembakau, bahan merokok, produk pengganti tembakau atau peranti merokok kepada orang yang lahir pada 1 Januari 2007 dan seterusnya;
- (b) keberkesanan larangan merokok produk tembakau atau produk pengganti tembakau dan larangan penggunaan apa-apa peranti merokok, bagi orang yang lahir pada 1 Januari 2007 dan seterusnya; atau
- (c) apa-apa perkara lain yang berhubungan dengan produk tembakau, bahan merokok atau produk pengganti tembakau.

(2) Menteri hendaklah menyebabkan suatu salinan laporan yang dibuat di bawah subseksyen (1) dibentangkan di hadapan kedua-dua Majlis Parlimen.

## BAHAGIAN XII

## KECUALIAN DAN PERALIHAN

**Kecualian****57. (1) Walau apa pun—**

- (a) subseksyen 13(1), tiada seorang pun boleh menjual apa-apa produk tembakau atau mengadakan apa-apa perkhidmatan untuk merokok kepada mana-mana orang yang lahir sebelum 1 Januari 2007 yang masih belum mencapai umur lapan belas tahun pada tarikh permulaan kuat kuasa peruntukan ini;
- (b) subseksyen 14(1), tiada seorang pun boleh menjual apa-apa bahan merokok, produk pengganti tembakau atau peranti merokok kepada mana-mana orang yang masih belum mencapai umur lapan belas tahun pada tarikh permulaan kuat kuasa peruntukan ini; dan
- (c) subseksyen 13(3) atau 18(1), mana-mana orang yang lahir sebelum 1 Januari 2007 yang belum mencapai umur lapan belas tahun pada tarikh permulaan kuat kuasa peruntukan ini tidak boleh membeli apa-apa produk tembakau atau merokok apa-apa produk tembakau.

**(2) Mana-mana orang yang melanggar—**

- (a) perenggan 57(1)(a) atau (b), melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi dua tahun atau kedua-duanya; atau
- (b) perenggan 57(1)(c), melakukan suatu kesalahan dan boleh, apabila disabitkan, didenda tidak melebihi lima ratus ringgit atau diperintahkan untuk melaksanakan suatu perintah khidmat masyarakat menurut Kanun Tatacara Jenayah atau Akta Kanak-Kanak 2001.



## **Peralihan**

**58.** (1) Mana-mana orang yang mengimport, mengilang atau mengedarkan produk tembakau, bahan merokok atau produk pengganti tembakau sebelum permulaan kuat kuasa subseksyen 3(1) dan 15(1) Akta ini hendaklah, dalam tempoh enam bulan dari tarikh permulaan kuat kuasa Akta ini, memohon kepada Ketua Pengarah untuk didaftarkan di bawah subseksyen 3(1) Akta ini.

(2) Jika Ketua Pengarah menolak permohonan bagi pendaftaran yang dibuat di bawah subseksyen 3(1), pengimport, pengilang, pengedar atau penjual produk tembakau, bahan merokok atau produk pengganti tembakau hendaklah, dengan perbelanjaannya sendiri, memanggil semula dan memberhentikan penjualan produk tembakau, bahan merokok atau produk pengganti tembakau itu.

---

## HURAIAN

Rang Undang-Undang Kawalan Produk Merokok Demi Kesihatan Awam 2023 (“Akta yang dicadangkan”) bertujuan untuk mengadakan peruntukan bagi perkara yang berhubungan dengan kawalan ke atas penjualan dan pembelian produk tembakau, bahan merokok, produk pengganti tembakau dan peranti merokok, demi kesihatan awam untuk melahirkan suatu generasi baharu yang bebas daripada pengaruh apa-apa produk tembakau, bahan merokok, produk pengganti tembakau dan peranti merokok.

## BAHAGIAN I

2. Bahagian I Akta yang dicadangkan memperkatakan mengenai perkara permulaan.
3. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.
4. *Fasal 2* mengandungi takrif bagi perkataan dan ungkapan tertentu yang digunakan dalam Akta yang dicadangkan.

## BAHAGIAN II

5. Bahagian II Akta yang dicadangkan memperkatakan tentang peruntukan yang berhubungan dengan pendaftaran dan pembatalan pendaftaran apa-apa produk tembakau, bahan merokok atau produk pengganti tembakau di bawah Akta yang dicadangkan.

6. *Fasal 3* bertujuan untuk menghendaki semua produk tembakau, bahan merokok atau produk pengganti tembakau untuk didaftarkan di bawah Akta yang dicadangkan. Mana-mana orang yang gagal mematuhi *fasal* ini melakukan suatu kesalahan.
7. *Fasal 4* bertujuan untuk memperuntukkan bahawa suatu permohonan bagi pendaftaran apa-apa produk tembakau, bahan merokok atau produk pengganti tembakau hendaklah dibuat kepada Ketua Pengarah dengan cara bersama-sama fi sebagaimana yang ditetapkan.
8. *Fasal 5* bertujuan untuk mengadakan peruntukan bagi pembatalan pendaftaran produk tembakau, bahan merokok atau produk pengganti tembakau.
9. *Fasal 6* bertujuan untuk memperuntukkan bahawa Ketua Pengarah hendaklah menyimpan dan menyenggara suatu daftar produk tembakau, bahan merokok dan produk pengganti tembakau yang didaftarkan di bawah *fasal 4*.

### BAHAGIAN III

10. Bahagian III Akta yang dicadangkan memperkatakan tentang larangan apa-apa pengiklanan, promosi dan tajaan produk tembakau, bahan merokok, produk pengganti tembakau atau peranti merokok dan tiruannya, dan peranti merokok.
11. *Fasal 7* bertujuan untuk melarang apa-apa penerbitan apa-apa iklan produk tembakau, bahan merokok, produk pengganti tembakau atau peranti merokok. Mana-mana orang yang gagal mematuhi *fasal* ini melakukan suatu kesalahan.
12. *Fasal 8* bertujuan untuk melarang apa-apa penerbitan apa-apa iklan produk tembakau, bahan merokok atau produk pengganti tembakau tiruan. Mana-mana orang yang gagal mematuhi *fasal* ini melakukan suatu kesalahan.
13. *Fasal 9* bertujuan untuk melarang apa-apa promosi atau tajaan apa-apa produk tembakau, bahan merokok, produk pengganti tembakau atau peranti merokok yang dimaksudkan atau berkemungkinan untuk menggalakkan mana-mana orang untuk merokok atau dipromosikan sebagai suatu produk berhenti merokok. Mana-mana orang yang gagal mematuhi *fasal* ini melakukan suatu kesalahan.

### BAHAGIAN IV

14. Bahagian IV Akta yang dicadangkan memperkatakan tentang kawalan penjualan apa-apa produk tembakau, bahan merokok atau produk pengganti tembakau dan tiruannya, dan peranti merokok.

15. *Fasal 10* bertujuan untuk melarang mana-mana orang daripada menjual atau mempamerkan untuk jualan apa-apa produk tembakau, bahan merokok atau produk pengganti tembakau, melainkan jika penjualan atau pameran untuk jualan itu mematuhi kehendak sebagaimana yang ditetapkan dalam peraturan-peraturan. Mana-mana orang yang gagal mematuhi *fasal* ini melakukan suatu kesalahan.

16. *Fasal 11* bertujuan untuk melarang mana-mana orang daripada menjual apa-apa produk tembakau, bahan merokok atau produk pengganti tembakau tiruan. Mana-mana orang yang gagal mematuhi *fasal* ini melakukan suatu kesalahan.

17. *Fasal 12* bertujuan untuk melarang apa-apa produk tembakau, bahan merokok, produk pengganti tembakau atau peranti merokok untuk diberikan sebagai pemberian atau hadiah. *Fasal* ini juga bertujuan untuk melarang penjualan apa-apa produk tembakau, bahan merokok, produk pengganti tembakau atau peranti merokok dengan apa-apa kupon, ganjaran, barang, tawaran atau perkhidmatan. Mana-mana orang yang gagal mematuhi *fasal* ini melakukan suatu kesalahan.

18. *Fasal 13* bertujuan untuk melarang penjualan dan pembelian apa-apa produk tembakau kepada dan oleh mana-mana orang yang lahir pada 1 Januari 2007 dan seterusnya. Mana-mana orang yang gagal mematuhi *fasal* ini melakukan suatu kesalahan.

19. *Fasal 14* bertujuan untuk melarang penjualan dan pembelian apa-apa bahan merokok, produk pengganti tembakau atau peranti merokok kepada dan oleh mana-mana orang yang lahir pada 1 Januari 2007 dan seterusnya. Mana-mana orang yang gagal mematuhi *fasal* ini melakukan suatu kesalahan.

#### BAHAGIAN V

20. Bahagian V Akta yang dicadangkan memperkatakan tentang kawalan harga, pembungkusan, pelabelan, pengilangan, pengimportan atau pengedaran apa-apa produk tembakau, bahan merokok atau produk pengganti tembakau.

21. *Fasal 15* bertujuan untuk memperuntukkan bahawa harga runcit atau jualan minimum apa-apa produk tembakau, bahan merokok atau produk pengganti tembakau hendaklah mengikut harga dan syarat yang ditetapkan. Mana-mana orang yang gagal mematuhi *fasal* ini melakukan suatu kesalahan.

22. *Fasal 16* bertujuan untuk memperuntukkan bahawa pembungkusan dan pelabelan apa-apa produk tembakau, bahan merokok atau produk pengganti tembakau hendaklah mengikut kehendak sebagaimana yang ditetapkan. Mana-mana orang yang gagal untuk mematuhi *fasal* ini melakukan suatu kesalahan.

#### BAHAGIAN VI

23. Bahagian VI Akta yang dicadangkan memperkatakan tentang peruntukan yang berhubungan dengan larangan merokok.

24. *Fasal 17* bertujuan untuk memberi Menteri kuasa, melalui perintah yang disiarkan dalam *Warta*, untuk mengisytiharkan mana-mana bangunan atau bahagian bangunan itu, tempat atau sebahagian daripada tempat itu, atau mana-mana kawasan atau kenderaan, yang orang ramai mempunyai akses sebagai kawasan atau tempat larangan merokok. *Fasal* ini juga memperuntukkan bahawa mana-mana orang yang merokok di kawasan atau tempat larangan merokok melakukan suatu kesalahan di bawah Akta ini.

25. *Fasal 18* bertujuan untuk melarang mana-mana orang yang lahir pada 1 Januari 2007 dan seterusnya daripada merokok apa-apa produk tembakau. Mana-mana orang yang gagal mematuhi *fasal* ini melakukan suatu kesalahan.

26. *Fasal 19* bertujuan untuk melarang mana-mana orang yang lahir pada 1 Januari 2007 dan seterusnya daripada merokok apa-apa produk pengganti tembakau atau menggunakan apa-apa peranti merokok dengan apa-apa bahan merokok. Mana-mana orang yang gagal mematuhi *fasal* ini melakukan suatu kesalahan.

27. *Fasal 20* bertujuan untuk mengadakan peruntukan bagi tanggungjawab tuan punya atau penghuni mana-mana bangunan, tempat, kawasan atau kenderaan yang berhubungan dengan perintah yang dibuat di bawah *fasal 17* yang dicadangkan. Mana-mana orang yang gagal mematuhi *fasal* ini melakukan suatu kesalahan.

#### BAHAGIAN VII

28. Bahagian VII Akta yang dicadangkan memperkatakan tentang liabiliti pengilang, pengimport atau pengedar.

29. *Fasal 21* bertujuan untuk memperuntukkan bahawa suatu label dan pembungkusan yang mengandungi apa-apa produk tembakau, bahan merokok, produk pengganti tembakau atau peranti merokok yang mengandungi nama, alamat atau tanda berdaftar seseorang pengimport, pengilang atau pengedar hendaklah menjadi keterangan *prima facie* bahawa produk tembakau, bahan merokok, produk pengganti tembakau atau peranti merokok itu diimport, dikilangkan atau dibungkus oleh orang yang namanya, alamatnya atau tanda berdaftarnya kelihatan pada pembungkus itu.

30. *Fasal 22* bertujuan untuk mengadakan peruntukan bagi tanggungjawab tiap-tiap pengilang, pengimport atau pengedar untuk memberikan apa-apa maklumat sebagaimana yang ditentukan oleh Ketua Pengarah atau mana-mana pegawai diberi kuasa yang berhubungan dengan apa-apa produk tembakau, bahan merokok, produk pengganti tembakau atau peranti merokok. Mana-mana orang yang gagal mematuhi *fasal* ini melakukan suatu kesalahan.

#### BAHAGIAN VIII

31. Bahagian VIII Akta yang dicadangkan memperkatakan tentang perkara yang berhubungan dengan pentadbiran Akta yang dicadangkan.

32. *Fasal 23* bertujuan untuk memberi Menteri kuasa, atas nasihat Ketua Pengarah bahawa terdapat situasi akut atau kritikal yang berhubungan dengan kegunaan atau penggunaan apa-apa produk tembakau, bahan merokok atau produk pengganti tembakau, untuk menubuhkan jawatankuasa untuk menasihatinya mengenai perkara itu. *Fasal* ini juga bertujuan untuk memberi Menteri kuasa, atas syor jawatankuasa, untuk melarang atau menyekat, tertakluk kepada apa-apa syarat yang difikirkannya patut, pengimportan, pengilangan, pengedaran dan penjualan apa-apa produk tembakau, bahan merokok atau produk pengganti tembakau melalui perintah yang disiarkan dalam *Warta*. Mana-mana orang yang gagal mematuhi *fasal* ini melakukan suatu kesalahan.

33. *Fasal 24* bertujuan untuk memberi Menteri kuasa melantik mana-mana orang untuk menjadi juruanalisis bagi maksud Akta ini.

34. *Fasal 25* bertujuan untuk memberi Menteri kuasa, melalui perintah yang disiarkan dalam *Warta*, untuk meluluskan mana-mana makmal untuk menjadi makmal yang diluluskan bagi maksud Akta ini dan makmal yang diluluskan itu akan dikeluarkan dengan suatu perakuan kelulusan.

35. *Fasal 26* bertujuan untuk memberi Menteri kuasa untuk melantik mana-mana orang untuk menjadi pegawai diberi kuasa bagi maksud Akta ini.

#### BAHAGIAN IX

36. Bahagian IX Akta yang dicadangkan memperkatakan tentang peruntukan yang berhubungan dengan penguatkuasaan.

37. *Fasal 27* bertujuan untuk memperuntukkan bahawa seorang pegawai diberi kuasa hendaklah mempunyai semua atau mana-mana kuasa seorang pegawai polis berhubung dengan siasatan yang diperuntukkan di bawah Kanun Tatacara Jenayah [*Akta 593*].

38. *Fasal 28* bertujuan untuk memberikan kuasa kepada pegawai diberi kuasa untuk mempunyai akses kepada mana-mana premis sekiranya pegawai diberi kuasa semunasabahnya percaya bahawa mana-mana premis digunakan atau boleh digunakan bagi pengilangan, pembungkusan, penyimpanan, penyerahan, pengedaran atau penjualan produk tembakau, bahan merokok, produk pengganti tembakau atau peranti merokok atau apa-apa produk tembakau, bahan merokok, produk pengganti tembakau atau peranti merokok tiruan pada bila-bila masa yang munasabah bagi maksud siasatan. *Fasal* ini juga memperuntukkan kuasa siasatan tertentu untuk dilaksanakan oleh pegawai diberi kuasa apabila memasuki premis.

39. *Fasal 29* bertujuan untuk memberikan kuasa kepada pegawai diberi kuasa, apabila pembayaran dibuat kepada mana-mana orang yang menjual produk tembakau, bahan merokok atau produk pengganti tembakau, untuk mengambil sampel bagi maksud analisis. *Fasal* ini juga bertujuan untuk memberikan kuasa kepada pegawai diberi kuasa untuk mengambil sampel daripada mana-mana pengilang, pengimport atau pengedar atau daripada ejen atau pekerjanya tanpa apa-apa bayaran. Mana-mana orang yang gagal mematuhi *fasal* ini melakukan suatu kesalahan.

40. *Fasal 30* bertujuan untuk mengadakan peruntukan bagi tatacara pengambilan sampel apa-apa produk tembakau, bahan merokok atau produk pengganti tembakau yang dimaksudkan untuk analisis oleh juruanalisis.

41. *Fasal 31* bertujuan untuk mengadakan peruntukan bagi anggapan yang berhubungan dengan apa-apa produk tembakau, bahan merokok atau produk pengganti tembakau yang disyaki telah melanggar peruntukan Akta ini yang telah diperoleh atau disita dalam sejumlah bekas, adalah memadai untuk menganalisis kandungan sampel tidak kurang daripada sepuluh peratus.

42. *Fasal 32* bertujuan untuk memberikan kuasa kepada pegawai diberi kuasa untuk membuka bagasi, bungkusan atau apa-apa bekas yang lain dan memeriksa apa-apa produk tembakau, bahan merokok, produk pengganti tembakau, peranti merokok atau produk tembakau, bahan merokok atau produk pengganti tembakau yang terkandung di dalamnya.

43. *Fasal 33* bertujuan untuk memberikan kuasa kepada pegawai diberi kuasa untuk memberhentikan, mengeledah dan menyita apa-apa pengangkut jika dia mempunyai sebab yang munasabah untuk mengesyaki suatu kesalahan di bawah Akta ini, kecuali bagi kesalahan di bawah seksyen 17, sedang atau telah dilakukan. Mana-mana orang yang gagal mematuhi *fasal* ini melakukan suatu kesalahan.

44. *Fasal 34* bertujuan untuk mengadakan peruntukan bagi penggeledahan dan penyitaan dengan waran oleh pegawai yang diberi kuasa setelah waran dikeluarkan oleh Majistret untuk memasuki premis itu pada bila-bila masa yang munasabah, dengan atau tanpa bantuan. Mana-mana orang yang gagal mematuhi *fasal* ini melakukan suatu kesalahan.

45. *Fasal 35* bertujuan untuk mengadakan peruntukan bagi penggeledahan dan penyitaan tanpa waran jika pegawai yang diberi kuasa mempunyai sebab yang munasabah untuk mempercayai bahawa mana-mana premis digunakan atau mungkin digunakan bagi maksud pengilangan pembungkusan, penyimpanan, penyerahan, pengedaran atau penjualan produk tembakau, bahan merokok atau produk pengganti tembakau atau apa-apa produk tembakau, bahan merokok atau produk pengganti tembakau tiruan dan sebarang penangguhan dalam mendapatkan waran geledah akan menjejaskan penyiasatan.

46. *Fasal 36* bertujuan untuk memberikan kuasa kepada pegawai diberi kuasa untuk mengakses maklumat berekod, data berkomputer, dsb.

47. *Fasal 37* bertujuan untuk memberikan kuasa kepada pegawai diberi kuasa untuk menyita apa-apa produk tembakau, bahan merokok, produk pengganti tembakau, peranti merokok atau produk tembakau, bahan merokok, produk pengganti tembakau atau peranti merokok tiruan, pengangkut, jentera, kelengkapan, buku, rekod, dokumen, artikel atau benda lain yang pegawai diberi kuasa mengesyaki secara munasabah telah atau akan digunakan untuk dalam pelakuan apa-apa kesalahan di bawah Akta ini.

48. *Fasal 38* bertujuan untuk mengadakan peruntukan bahawa pegawai diberi kuasa hendaklah menyediakan suatu senarai produk tembakau, bahan merokok, produk pengganti tembakau, peranti merokok, atau produk tembakau, bahan merokok, produk pengganti tembakau atau peranti merokok tiruan, pengangkut, jentera, kelengkapan, buku, rekod, dokumen, artikel atau benda lain yang disita dan hendaklah menandatangani senarai itu.

49. *Fasal 39* bertujuan untuk mengadakan peruntukan bagi pemulangan sementara apa-apa pengangkut, jentera atau kelengkapan yang disita di bawah Akta yang dicadangkan.

50. *Fasal 40* bertujuan untuk mengadakan peruntukan bahawa kos memegang apa-apa produk tembakau, bahan merokok, produk pengganti tembakau, peranti merokok, atau produk tembakau, bahan merokok, produk pengganti tembakau atau peranti merokok tiruan, pengangkut, jentera, kelengkapan atau artikel yang disita, dalam jagaan pegawai diberi kuasa sementara menunggu apa-apa prosiding di bawah Akta ini selesai, boleh didapatkan semula sebagai hutang sivil yang kena dibayar kepada Kerajaan.

51. *Fasal 41* bertujuan untuk memberikan kuasa kepada pegawai diberi kuasa yang membuat siasatan di bawah Akta yang dicadangkan untuk menghendaki kehadiran mana-mana orang yang mempunyai pengetahuan tentang fakta dan hal keadaan kes dan orang itu hendaklah hadir sebagaimana yang dikehendaki.

52. *Fasal 42* bertujuan untuk memberikan kuasa kepada pegawai diberi kuasa untuk memeriksa secara lisan mana-mana orang yang mempunyai pengetahuan tentang fakta dan hal keadaan kes itu.

#### BAHAGIAN X

53. Bahagian X Akta yang dicadangkan memperkatakan tentang cara yang berhubungan dengan perbicaraan dan prosiding.

54. *Fasal 43* bertujuan untuk memperuntukkan bahawa pendakwaan yang dibuat di bawah Akta ini atau mana-mana peraturan-peraturan yang dibuat di bawah Akta ini hendaklah dimulakan dengan keizinan secara bertulis Pendakwa Raya.

55. *Fasal 44* bertujuan untuk memperuntukkan bahawa jika keterangan pakar hendak dikemukakan oleh seseorang yang dituduh, pendakwaan hendaklah dimaklumkan melalui notis secara bertulis dalam tempoh masa sepuluh hari genap sebelum perbicaraan.

56. *Fasal 45* bertujuan untuk memperuntukkan bahawa Majistret Kelas Pertama hendaklah mempunyai bidang kuasa penuh untuk membicarakan apa-apa kesalahan di bawah Akta ini.

57. *Fasal 46* bertujuan untuk mengadakan peruntukan bagi perlindungan pemberi maklumat bagi maksud Akta ini.

58. *Fasal 47* bertujuan untuk mengadakan peruntukan bagi perkara yang berhubungan dengan ejen provokasi.

59. *Fasal 48* bertujuan untuk memperuntukkan bahawa mana-mana pegawai diberi kuasa tidak boleh menzahirkan apa-apa maklumat yang bertentangan dengan kepentingan awam dan menjejaskan perlindungan saksi.

60. *Fasal 49* bertujuan untuk memberikan kuasa kepada Ketua Pengarah atau pegawai diberi kuasa untuk menyampaikan kepada mana-mana orang yang melakukan kesalahan di bawah Akta ini suatu notis yang memerintahkan orang itu hadir di hadapan mahkamah majistret.

## BAHAGIAN XI

61. Bahagian XI Akta yang dicadangkan memperkatakan tentang peruntukan am.
62. *Fasal 50* bertujuan untuk mengadakan peruntukan bagi perkara yang berhubungan dengan pengkompaunan kesalahan.
63. *Fasal 51* memperkatakan tentang kesalahan yang dilakukan oleh pertubuhan perbadanan.
64. *Fasal 52* bertujuan untuk mengadakan peruntukan bagi perlindungan pegawai diberi kuasa daripada liabiliti dalam melaksanakan tanggungjawabnya di bawah Akta yang dicadangkan.
65. *Fasal 53* bertujuan untuk mengadakan peruntukan bagi perlindungan Kerajaan daripada apa-apa liabiliti yang berhubungan dengan apa-apa kerosakan semasa siasatan.
66. *Fasal 54* bertujuan untuk memberi Ketua Pengarah kuasa untuk mewakilkan apa-apa kuasa, tanggungjawab atau fungsi kepada mana-mana pegawai di bawah kawalan, arahan dan pengawasannya.
67. *Fasal 55* bertujuan untuk memberi Menteri kuasa untuk membuat peraturan-peraturan bagi maksud Akta yang dicadangkan.
68. *Fasal 56* bertujuan untuk memasukkan fasal baharu 54 ke dalam Akta yang dicadangkan untuk memperuntukkan bahawa Ketua Pengarah hendaklah mengadakan suatu laporan mengenai keberkesanan larangan penjualan, larangan merokok dan larangan penggunaan, apa-apa produk tembakau, bahan merokok, produk pengganti tembakau atau peranti merokok, dan laporan itu hendaklah dikemukakan kepada Menteri yang kemudiannya hendaklah menyebabkan laporan itu dibentangkan di kedua-dua Majlis Parlimen.

## BAHAGIAN XII

69. *Fasal 57* dan *58* Bahagian XII bertujuan untuk mengadakan peruntukan bagi kecualian dan peralihan.

*IMPLIKASI KEWANGAN*

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U2)3190]